

ورقة توت

انا موصوفك ...
بين السطور تلاقيني
حروف تعشق تراب سكتك
وف ضحكك بيطير حمامي
يجمع تقاوي النور شبابيك
وديك يصحي الفجر من نومه
ونقش الندى ف هدومه
يطرح للنهار يومه
تشقشق ف السما شمسك
ومن همسك ..
يحلا الغنا لعنيك
أنا اللي موصوفك
ومين غيري ح يتحمل
من الآخر .. من الأول ..

أنا من وحل أيامك
وانا اللي عودي انكسر..
من لحن أوهامك
وابلع دموعي ..
واخبي الجرح جوايا
والحس صحون الصبر في عشايا
حتى الغطا موجوع ..
والحلم لقمة وستر
وحبة ضي في السكة
نفسى انام مرتاح
وكفايه نوم ع الدكه
قالوا : بكره تتعدل
وعدا بكره واخواته
ولسه الدمع ف جفوني
ولسه الحلم في مماته
ما فضلشي مني يا وطن

غير حبة صلا وسكوت

وعمر شايل سكته

عارف طريق الموت

وحلمي اللي باقي

ف دنيتي

ما تسبيلي ورقة توت

....